

Inatsisissatut siunnersuummut nassuiaatit

### **Nalinginnaasumik oqaaseqaatit**

#### **1. Aallaqqaasiut:**

Naalakkersuisut 1993-imi Nunalerineq pillugu Siunnersuisoqatigiit pilersippaat Siunnersuisoqatigiit nunalerinermut tunngasutigut Naalakkersuisunut siunnersuisarnissaat siunertaralugu, aammalu suliaasanik allanik suliaqarsinnaanerat siunertaralugu.

Kommunit kattunnerat tunngavigalugu Nunalerineq pillugu Inatsisartut inatsisaat 2008-mi allanngortinneqarpoq, takuuk Nunap immikkoortuisa kommunillu nutaamik agguarneqarnerisa kinguneranik aalisarnermi nunalerinermilu Inatsisartut inatsisaata aamma Inatsisartut peqqussutaasa assigiinngitsut allanngortinnissaanut Inatsisartut inatsisaat nr. 11, 5. december 2008-meersoq. Allannguutip kinguneraa siornatigut kommuniusimasuni pingasuni ilaasortat pingasut Kommune Kujallermit ilaasortatut pingasutut inissinnerat. Tamassuma kingorna Nunalerineq pillugu Siunnersuisoqatigiit paasivaat pissutsit allat isiginiarneqarnissaat kommunit kattunneqarnerisa kingunerigaa, taamaalilluni siunnersuisoqatigiinni ilaasortat katiterneqarnerisa allanngorteqqinneqarnissaa tunngavissaqarluni.

Suliamik maannakkut ingerlatsisoqarpoq, tassani Nunalerineq pillugu Siunnersuisoqatigiit ingerlatsinermi suliaasaat immikkoortortaqaqfinnut allanut nuunniarneqarlutik. Ilaatigut pissutaavoq isumaqartoqarmat ingerlatsinermi suliaasaat taakku immikkoortortaqaqfinni allani naleqqunnerusumik suliarineqarsinnaasut, aammali Nunalerineq pillugu Siunnersuisoqatigiit ingerlatsinermi suliaasanik ingerlatsisuunatik Naalakkersuisunut siunnersuisuunerisa isiginiarneqarnissaa kissaatigineqarmat. Nunalerineq pillugu Siunnersuisoqatigiit inissisimanerisa Aalisarneq Piniarnerlu pillugit Siunnersuisoqatigiit inissisimanerannut sanilliunneqarnissaanik Naalakkersuisoqarfiup kissaateqarnera tamassumunnga tunngaviuvoq. Immikkoortortaqaqfinnut taakkununnga tunngasunik Nunalerineq pillugu Siunnersuisoqatigiit ingerlatsinermik suliaqarsinnaanerannik Naalakkersuisunit pisinnaatinneqarsinnaanerat pillugu aalajangersakkap peerneqarnissaata kissaatigineqarnera tamassumunnga tunngaviuvoq. Allannguutip taassuma kinguneranik Nunalerineq pillugu Siunnersuisoqatigiit ataanni sulisoqarfinni sulisut sinniisaat Nunalerineq pillugu Siunnersuisoqarfinni sulisut sinnissaannik taarserneqassaaq.

Tamassuma saniatigut Namminersorlutik Oqartussat atuutilersinneqarnerat tunngavigalugu inatsimmi allannguisoqarpoq.

#### **2. Siunnersuummi pingaarnertut tunngavigineqartut:**

Immikkoortut pingasut pingaarnerit siunnersuummiippat:

- Kommune Kujallermit ilaasortat pillugit allannguutit.

- Siunnersuutigineqarpoq Fødevarestyrelsemit ilaasortap Namminersorlutik Oqartussani Uumasut Nakorsaqarnikkut Immikkoortortaqaarfimmit ilaasortamit taarserneqassasoq.
- Nunalerineq pillugu Siunnersuisoqatigiit suliassaasa allanngorneratigut § 14 c, imm. 2-p atorunnaarsinneqarnera.

Ilaasortat Kommune Kujalliup toqqagai:

Kommunit kattunneqarnerisa kinguneraa savaateqarfiit kommunimut ataatsimut kattunneqarnerat. Nunalerineq pillugu Inatsisartut inatsaata 2008-mi allanngortinneqarnerata kingorna Nunalerineq pillugu Siunnersuisoqatigiinni ilaasortat qanoq ingerlatsinissaat allanngorpoq. Kommunit kattunneqarnerat allannguummut tunngaviuvoq. Nunalerineq pillugu Siunnersuisoqatigiit katitigaanerat kommunit savaateqarfiusut tamarmik ilaasortaataqarnissaasa qulakkeerneqarnissaannik pisariaqartitsinermik siornatigut tunngaveqarpoq.

Taamatut isiginninniarnissap atorunnaarnissaa kommunit kattunneqarnerisa kinguneraa. Suliassat inunnit ikinnerusunit maannakkut suliarineqarsinnaalerput. Ilaasortat Kommune Kujalliup toqqagaasa pingasuniit marlunnut ikilisinneqarnissaannik siunnersuuteqarnermut tamanna tunngaviuvoq. Allanguut Nunalerineq pillugu Siunnersuisoqatigiinnit siunnersuutaavoq, siunnersuullu kommunimit taparserneqarpoq.

Ilaasortaq Fødevarestyrelsep toqqagaa:

Namminersorlutik Oqartussat Uumasut Nakorsaqarnikkut Immikkoortortaqaarfiup Nunalerineq pillugu Siunnersuisoqatigiinni ilaasortaataqalerneratigut Nunalerineq pillugu Siunnersuisoqatigiinni sulineq siamasinnerutinneqarsinnaalerpoq.

Uumasut Nakorsaqarnikkut Immikkoortortaqaarfik nunalerinermik inuussutissarsiornermi ingerlatsinermut tunngatillugu pingaaruteqartunik arlalinnik suliaqarpoq. Suliat pingaarnerit ilaatigut tassaapput nunalerinermi uumasut nakorsaqarnermi ingerlatsineq aammalu nunami namminermi tuniniaavinnut uumasunik toqoraanermi neqinik misissuineq. Ilisimasatigut tamakkunatigut Nunalerineq pillugu Siunnersuisoqatigiit Naalakkersuisunut siunnersuisutut inissisimanerat nukittorsarneqassaaq.

§ 14 c, imm. 2-p atorunnaarsinneqarnera pillugu:

Siunnersuutigineqarpoq § 14 c, imm. 2-mi aalajangersagaq immikkoortumi suliassat nuunneqarnissaannik suliaqarneq maannakkut ingerlasoq tunngavigalugu atorunnaarsinneqassasoq. Ingerlatsinermi suliassat immikkoortortaqaarfinni allani naleqqunnerusumik suliarineqarsinnaanerannik Naalakkersuisoqarfiup isumaqarnera aammalu nunalerineq pillugu apeqqutini Nunalerineq pillugu Siunnersuisoqatigiit Naalakkersuisunut siunnersuisuunerminnik aallussinerulernissaannik kissaateqarneq pissutigalugit nuunneqarput. Nunalerineq pillugu Siunnersuisoqatigiit inissisimanerisa Aalisarnek Piniarnerlu pillugit Siunnersuisoqatigiit inissisimanerannut sanilliunneqarnissaannik kissaateqarnermut tamanna aamma naapertuuppoq.

Nunalerineq pillugu Siunnersuisoqatigiit suliassaannut tunngavimmi ersippoq siunnersuisoqatigiit ingerlatsinermut suliassa maannamut ilagigaat Nunalerinermut Siunnersorteqarfiup Upernaviarsuullu, savaatilissanut ilinniarfittut misileraavittullu atorneqartup, ingerlanneqarnerannik suliqaarneq. 1. januar 2012 aallarnerfigalugu Aalisartunut Piniartunullu Siunnersuisoqarfimmut isumaqatigiissutip assinganik Nunalerineq pillugu Siunnersuisoqarfimmut anguniagassat pillugit isumaqatigiissusiortoqassaaq. Upernaviarsummi ilinniartitsinerit Ilinniartitaanermut Ilisimatusarnermullu Naalackersuisoqarfimmit akisussaaffigineqartussanngorlugit nuunneqassapput. Siunissami Upernaviarsummi misileraanernut tunngasut sularineqartartut Nunalerineq pillugu Siunnersuisoqarfimmit sularineqartassapput. Tamatumap kingorna Nunalerineq pillugu Siunnersuisoqatigiit tamakkuninnga ingerlatsinissaat pisariaarutissaaq, taamaalilluni § 14 c, imm. 2 atorfissaarunneqassaaq.

Nunalerineq pillugu Siunnersuisoqatigiit siunissami makkuninnga suliqaarnissaat siunnersuutip kinguneraa:

- Nunalerineq pillugu Siunnersuisoqatigiit nunalerinermut tunngasutigut Naalackersuisunut siunnersuinermik ingerlatsissallutik.
- Kalaallit Nunaanni nunalerinerup aqunneqarnerata iluani suliniutit nutaat pillugit Naalackersuisunut oqaaseqaateqartassallutik.
- Nunalerinermut tunngatillugu nammineq suliniutigalugu Naalackersuisut suliniutissanik nutaanik siunnersuuteqarnissamut imaluunniit inatsisit atuuttut allanngortinnissaannik siunnersuuteqaqqullugit inattarlugit.
- Nunalerinermi aningaasarsiornikkut ineriartorneq malinnaaffigissallugu paasissutissat katersorneratigut sularineratigullu.
- Inuussutissarsiorerup tamakkiisup aningaasarsiornikkut pitsaasumik ineriartornissaa siuarsarumallugu siunnersuuteqartassalluni.
- Aningaasanut inatsimmi nunalerinermut tapiissutaasartut agguarneqarnissaannut atorneqarnissaannullu siunnersuuteqassalluni.

#### Inerniliineq:

Ilimagineqarpoq siunnersuisoqatigiit katitigaanerata nutaaq naleqqunnerusumik ingerlatsiviussasoq. Ingerlatsineri suliassanik allanngortitsineq Nunalerineq pillugu Siunnersuisoqatigiit siunnersuisutut inissisimanermik annertunerusumik isiginninnialernissaannik aamma kinguneqassaaq.

Allannguutit qulaaniittut Nunalerineq pillugu Siunnersuisoqatigiit Sulineri Najoqqutassaata allanngorneranik kinguneqassapput aammalu Nunalerineq pillugu Siunnersuisoqatigiit Suleriaasiat nutarterneqassaaq.

### **3. Pisortanut tunngatillugu aningaasaqarnikkut aqutsinikkullu kingunissai:**

Ilaasortat Kommune Kujallermit toqqakkat pingasuniit marlunnet ikilisinnerisigut aningaasatigut sipaaruteqarnissaq naatsorsuutigineqarpoq. Sipaarutit qanoq annertutigisinnanissaat pillugu naatsorsuisoqarnikuunngilaq.

**4. Inuussutissarsiuteqartunut tunngatillugu aningaasaqarnikkut aqutsinikkullu kingunissai:**

Inuussutissarsiuteqartunut tunngatillugu aningaasaqarnikkut aqutsinikkullu kinguneqassanngilaq.

**5. Avatangiisinut pinngortitamullu kingunissai:**

Avatangiisinut pinngortitamullu kinguneqarnissaa naatsorsuutigineqanngilaq.

**6. Innuttaasunut tunngatillugu aqutsinikkullu kingunissai:**

Innuttaasunut tunngatillugu aqutsinikkut kinguneqassanngilaq.

**7. Naalagaaffeqatigiinnermut Namminersorlutillu Oqartussanut attuumassuteqarnera:**

Attuumassuteqanngilaq.

**8. Pisortatigut oqartussat kattuffiillu tusarniaavigineqarnerat:**

Tusarniaaneq 13. maj-imiit 24. juni-imut 2011 ingerlanneqarpoq. KANUKOKA-p tusarniaanerp sivitsorneqarnissaa kissaatigisimavaa, tamatumalu kingorna tusarniaaneq sivitsorneqarsimavoq 7. juli 2011 tikillugu.

Siunnersuut kommuninut immikkoortunullu ukununga tusarniaassutigineqarpoq: KANUKOKA, Savaatillit Peqatigiit Suleqatigiissut, Nunalerineq pillugu Siunnersuisoqarfik, Nunalerineq pillugu Siunnersuisoqatigiit, Inuussutissarsiornermut Suliffeqarnermullu Naalackersuisoqarfik, Ilinniartitaanermut Ilisimatusarnermullu Naalackersuisoqarfik aamma Aningaasaqarnermut Naalackersuisoqarfik.

Tusarniaanermi akissutit makku tiguneqarput:

Kommune Kujalleq oqaaseqaatissaqanngilaq, kisiannili Nunalerineq pillugu Siunnersuisoqatigiit aamma Nunalerineq pillugu Siunnersuisoqarfiup immikkoortinneqarnissaat iluaralugu oqaaseqarfigalugu.

Inuussutissarsiornermut Suliffeqarnermullu Naalackersuisoqarfik nalunaaruteqarpoq siunnersuummut oqaaseqaatissaqarani.

**Siunnersuummi aalajangersakkanut ataasiakkaanut oqaaseqaatit**

*§ 1-imut*

Nr. 1-imut.

Nunalerineq pillugu Siunnersuisoqatigiit inassuteqaataat tunngavigalugu siunnersuutigineqarpoq:

Nunalerineq pillugu Siunnersuisoqatigiinnik qulingiluanik ilaasortalimmik paragraffip oqaasertaani allassimasutut agguarneqartumik Naalakkersuisut pilersitsissasut.

Allannguutip kinguneraa ilaasortat Kommune Kujallermit toqqakkat amerlassusaat pingasuniit marlunnut ikilisinneqassasut.

Nunalerineq pillugu Siunnersuisoqatigiit ataanni sulisoqarfiit pillugit akisussaanerup immikkoortorta qarfinnut allanut nuunneqarnerata kinguneranik sulisut sinniisaat siusinnerusukkut siunnersuisoqatigiinni ilaasortaasoq Nunalerineq pillugu Siunnersuisoqarfinmi sulisut sinniisaannit taarserneqarpoq.

Fødevarestyrelsemit ilaasortaataq Namminersorlutik Oqartussat Uumasut Nakorsaqaarnikkut Immikkoortorta qarfiannit taarserneqassaaq. Uumasut Nakorsaqaarnikkut Immikkoortorta qarfinmit Nunalerineq pillugu Siunnersuisoqatigiinnut ilaasortaataqalernikkut kissaatigineqarpoq nunalerinermik inuussutissarsiuteqartut uumasut nakorsaqaarnerannut tunngasunut oqartussanik qaninnerusumik suleqatigiilernissaat.

Savaatillit Peqatigiit Suleqatigiissut ilaasortaataat marluk, Neqi A/S-ip ilaasortaataa aammalu Pinngortitaleriffimmit inassuteqaat tunngavigalugu Naalakkersuisunit toqqagaq allan-nguuteqanngillat.

Nunaateqarfiit Kommune Kujalliup avataani inissisimasut Savaatillit Peqatigiit Suleqatigiissut aqutugalugit sinniisoqarnerat ingerlaannassaaq.

Nr. 2-mut

Nunalerineq pillugu Siunnersuisoqatigiit suliassa at allanngortinneqassapput. Siunnersuisoqatigiit ingerlatsiner mi suliassanik suliaqarunnaassapput. Tamanna tunngavigalugu § 14 c, imm. 2-p pisariaqartutut isigineqarunnaarmat atorunnaarnissaa siunnersuutigineqarpoq.

Suliassat pillugit akisussaanerup allanngornera Nunalerineq pillugu Siunnersuisoqatigiit siunnersuisutut inissimanerisa isiginiarneqarnerulernissaa ilimagineqarpoq. Tassunga peqatigitillugu Nunalerineq pillugu Siunnersuisoqatigiit inissimanerisa Aalisarneq pillugu Siunnersuisoqatigiit aamma Piniarneq pillugu Siunnersuisoqatigiit inissimanerannut sanilliunneqalernerat siunnersuutip kinguneraa.

Nunalerineq pillugu Siunnersuisoqarfimmik ingerlatsineq angusassat pillugit isumaqatigiissutikkut siunissami killilersorneqassaaq. Misileraavik Nunalerineq pillugu Siunnersuisoqarfiup ilaatut siunissami ingerlalissaaq, taamaammallu taanna angusassat pillugit isumaqatigiissut atorlugu killilersorneqassaaq.

Savaatilinggorniat Atuarfiannik ingerlatsineq pillugu akisussaaneq Aalisarnermut, Piniarnermut Nunalerinermullu Naalakkersuisoqarfimmit Ilinniagaqarnermut Ilisimatusarnermullu Naalakkersuisoqarfimmut nuunneqassaaq. Naalakkersuisut isumaqarput Savaatilinggornianut Atuarfik Ilinniagaqarnermut Ilisimatusarnermullu Naalakkersuisoqarfimmit ilinniarfiit allat assigalugit ingerlanneqartariaqartoq.

Nr. 3.-miit 5-imut.

Namminersorluni Oqartussaanerup atuutilersinneqarnerata kinguneranik taakku allannguutaapput.

*§ 2-mut*

Siunnersuutigineqarpoq Inatsisartut inatsisaat ulloq 1. januar 2012 atuutilissasoq.